

Stranke moraju pokazati odgovornost pri odabiru zvaničnika za funkcije u organima vlasti



Visoki predstavnik Valentin Inzko je danas najavio odluku o prekidu procesa provjere kandidata za ministarske funkcije. Ta odluka stupa na snagu odmah. „Odluku sam donio nakon konsultacija s ambasadorima zemalja članica Upravnog odbora Vijeća za provedbu mira i u skladu sa konceptom jačanja odgovornosti lokalnih vlasti za odvijanje demokratskih procesa“, rekao je Inzko.

Proces provjere kandidata koji je vršila međunarodna zajednica uveden je kako bi se za građane Bosne i Hercegovine osiguralo da demokratski izabrani zvaničnici na rukovodećim pozicijama ispunjavaju odgovarajuće standarde. Ovi standardi se nisu promijenili, međutim, sada će stranke koje su zastupljene u entitetskim i kantonalnim zakonodavnim tijelima imati odgovornost da osiguraju da budući zvaničnici, koji će obavljati funkcije u organima vlasti, nisu osobe za koje je utvrđeno da su opstruirale provođenje Dejtonskog mirovnog sporazuma, da nisu optuženi za ratne zločine, te da nisu u pitanju osobe koje su počinitelji teških krivičnih djela.

„Međunarodna zajednica želi da lokalni lideri preuzmu veću odgovornost za način na koji se vodi i upravlja ovom zemljom“, objasnio je visoki predstavnik. Ova odluka je donesena na dan kada su objavljeni zvanični rezultati izbora, kako bi stranke bile svjesne očekivanja međunarodne zajednice i kako bi javnost ovo imala na umu kada dođe do nominiranja kandidata za

visoke funkcije.

Proces provjere kandidata koji je vodila međunarodna zajednica započet je 2000. godine. Tokom 2005. godine, Parlament BiH je uveo vlastiti mehanizam za provjeru kandidata za ministarske funkcije na državnom nivou, na osnovu informacija dostupnih agencijama za provođenje zakona u BiH. „Očekujem od vlasti na entitetskom i kantonalnom nivou da uvedu vlastite mehanizme provjere kandidata, slične mehanizmima koji već postoje na državnom nivou“, dodao je visoki predstavnik.

Ova odluka visokog predstavnika odnosi se samo na preventivni postupak provjere kandidata za ministarske pozicije. Visoki predstavnik zadržava sva ovlaštenja za smjenjivanje zvaničnika s funkcija, kao što je to bio slučaj i do sada, u skladu s njegovim ovlastima koje proizilaze iz Dejtonskog mirovnog sporazuma, uključujući i smjenjivanje zvaničnika povezanih s korupcijom, ratnim zločinima ili drugim aktivnostima koje ugrožavaju provedbu Dejtonskog mirovnog sporazuma.